

ألا أونه

وضاع الحلم واتبدد
وفاضل ذكرى جرح كبير مالوش آخر
واديني بقيت منيش فاكر ... أنا ابقى مين
أمد الخطوة ... واتردد
وكان عندي الأمل واهو مات
وعمري فات وعداني
ف لحظة ضعف مجنونة
يضيع العقل وغصون الشجر تنشف
واديني وقفت في وسط المزاد ... باتباع
"ومين يا خلق هيزود؟"
جرس بيدق ف وداني
وصوت يقول : "ألا أونه"
وشفت السكة من تحت القدم بتضيع
وشفت السكة قدام القدم بتضيع

ونار ينتهب تحرقني

وصوت زي النباح بيرن ف وداني

"ألا أونه ألا أونه "

فتحت عنيا لاجل أشوف

واحاول أفهم الموضوع

لقيت كل الكلاب واقفة

عشان تغرس ف لحمي الناب

واكون كذاب

إذا قلت ان واحد قال

بتعريفة

~~~~~